

意林卷之五

扶風馬總元會編

墓

周生烈子五卷

序云六蔽鄙夫燉煌周生烈字文逸張角敗後天下潰亂哀苦之間故著此書以堯舜作

幹植仲尼作師誠○御馬失節其車是碎御天下失節四海失墜禁紂是湯武之梯秦項是大漢之階四逆不興則四順不昇○賢君不可以色貌誘之猶張羅恤鳳施穿誘麟伯樂相馬取之於瘦聖人相士取之於踈聽訟不如使勿訟善斷不如使勿亂○理天網仗八柄遵元象操衆有者天子也撫人物參天意者三公也執分節事修理者士也臨死修善於計已晚事迫乃歸於救已微有階者易成基無因者難成時○鳩傳集聖業披豹皮類似質道表是裏非○人者天之舌物者神之口天高地厚報應故晚辭者主之弓弩教者君之機關○矜賞若春重罰若秋行禮若火誅教若水讓一得百爭十失九

荀悅申鑒五卷

序云夫道本仁義五經以經之羣籍以緯之前鑒既明今又申之故曰申鑒○君臣親而有禮百官和而不同此治國之風也禮俗不一庶人作議此表國之風也君臣爭盟大夫爭名此乖國之風也上多欲下多端法不定

政多門此亂國之風也以割下作能附上作忠此叛國之風也小臣爭寵大臣爭權此害國之風也上不訪下不諫婦言用內政行此亡國之風也○善禁者先禁身而後人不善禁者先禁人而後身三日致武事四曰禁數○秦之滅學也書朽於屋壁義絕於朝野學聖不至聖可以盡生學壽不至壽可以盡命○君子有三鑒鑒乎前鑒乎人鑒乎鏡○下不鉗口上不塞耳則有所聞矣○思慮慮於上世瞻仲尼於中古乃知小道者足羞也思伯夷於首陽想四皓於商山乃知穢妄者足恥也存張騫於西極念蘇武於朔方乃知懷安者足鄙也

仲長昌言十卷

教化以禮義為宗禮義以典籍為本常道行

於百世權宜用於一時高辛已往則聞其人

不見其書唐虞夏殷則見其書不詳其事周氏已采載籍具矣○後嗣愚王見天下莫與之違奔其私情騁其邪欲君臣宣淫上下同惡目極角觝之觀耳窮鄭衛之聲入則騁於婦人而不反出則馳於田戈而不還信任親愛寵貴后妃命移運去不自知也○建旗伐鼓高烽明候守邊之猛將非中國之良吏和鑿法駕清道而行便辟揖讓諸夏之威儀非夷狄之有也○董賢之於哀帝無骨肉絲髮之親又不能傳其氣類定其繼嗣以丈夫交接之歡自成膠漆也○景帝顯位刺史者皆是官臣子弟猶如豺狼守肉鬼魅待疾曰在天之內在人之外○人愛我我愛之人憎我我憎之○天下士有三俗選士而論族姓閭閻一俗交游趨富貴之門二俗畏服不接於貴尊三俗天下之士有三可賤慕名而不知實一可賤不敢正是非於富貴二可賤向威背衰三可賤○天下學士有三姦焉實不知詳不言一也竊他人之記以成己說二也受

無名者移知者三也○知言而不能行謂之疾此疾雖有天醫莫能治也同於我者何必可愛異於我者何必可憎智足以立難成之事能足以圖附者不黨疎者不遠○婦人有朝哭良人暮適他土涉歷百庭顏色不愧令公侯之官美女數百卿士之家侍妾數十畫則以醇酒淋其骨髓夜則以房室輸其血氣○人之性有山峙淵渟者患在不通巖剛則絕者患在傷士廣大闊蕩者患在無檢和順恭慎者患在少斷端毅清潔者患在拘狹辯通有辭者患在多言安舒沈重者患在後時好古守經者患在不變勇毅果敢者患在險害疏濯骨臆滌雪腹心使之芬香皓潔白不可污也道德仁義天性也織之以成其物鍊之以致其精塗之以發其光幽暗則巧人之所短會同則述人之所長負我者我又加厚焉疑我者我又加信焉難必相恤利必相反○事君不為君所知忠未至也與人交不為人所信義未至也父母不好學業惡子孫學之可遠而學也父母不好士惡子孫友

之可遠而交也○英辭雨集妙句雲來受相攻命之自然也愜快以志人情之所欲也○嗽舌下泉咽之名曰胎食得道者生六翻於臂長毛羽於腹飛無階之蒼天度無窮之世俗北方寒而人壽南方暑而人夭如蠶寒而飢則引日多溫而飽則引日少湯契後秦益後益即皋陶子也

典論五卷
堯崩舜避堯子於南河之南舜崩禹避舜子於陽城禹崩益避禹子於基山之陰事見史記○如彼登山乃勤以求高如彼浮川乃勤以求遠惟心弗勤時亦靡剋○應瑒云人生固有入心答云在親曰孝施物曰仁仁者有事之實名非無事之虛稱善者道之母羣行之主○序云佞邪穢政愛惡敗俗國有此二事欲不危已不可得也○桓靈之際闔寺專命於上布衣橫議於下千祿者殫貨以奉貴要名者傾身以事勢位成乎私門名定乎橫巷由是戶異議人殊論論無常檢事無定價長愛惡與朋黨○夷吾侈而鮑叔廉此其志不

同也張竦潔而陳遵汚此其行不齊也○主與民有三求求其謂已勞求其謂已死求其謂已生○法者主之柄吏者民之命法欲簡而明吏欲公而平○詩刺豔妻書誡晨婦司隸馮方女有國色避亂揚州袁術登城見而悅之遂取焉甚寵之諸婦教之曰將軍貴人重其志節宜數涕泣示憂愁也若如此加重馮氏後每見術垂泣術果以謂有心益寵之諸婦乃共絞殺懸之於廁言其哀怨自殺術以其不得志而死厚加殯殮袁紹妻劉氏甚妬忌紹死未殯劉氏殺其妻五人恐死者有知復能寵之乃髡頭黑面以毀其容○上洛都尉王琰以功受封其妻泣於內恐琰富貴更取妻妾○荊州牧劉表跨有南土子弟驕貴以酒器名三爵上者曰伯雅受七勝中雅受六勝李雅受五勝又設大鏡於杖端有醉者輒以劍刺之驗其醒醉然人形性同於燕類勞則早斃逸則晚死○余喜彈碁略盡其巧少嘗作賦昔京師有東方世安張公子嘗恨不得與彼數子對之○太子篇序云余蒙

隆寵忝當上嗣憂惶踉蹌上疏自陳欲繫辭
博稱則父子之間不文也欲略言直說則喜
懼之心不達也里語曰汝無自譽觀汝作家
書言其難也

魏子十卷

源靜則流清本正則末茂內修則外理形端
則影直天生君子所以治小人天生小人所
以奉君子無君子則無畜小人無小人則無
以養君子錄人一善則無棄人採材一用則
無棄材人皆易華嶽以謂卑小故登之而摧
傷難天以謂高大故不昇而無殃○鼎以希
出而世重之釜鑪常用而世輕之○古有弟
子病師數往看之師至弟子輒起因勞而致
死師非不仁弟子非無禮傷於數也薄水富
白日聚毛遇猛火雖欲遠害其勢不可莫嘉
在夢則生在芥則死非夢仁而芥賊失於本
不可也○諺曰已是而彼非不當與非爭彼
是而已非不當與是爭○君子表不隱裏明
暗同度○苦躬富貴之梯階○仲尼無契券
於天下而德著古今善惡明也鏡照醜好而

人不怨法明善惡而人不恨

人物志三卷 劉劭

草之精秀者英獸之將羣者雄張良是英韓
信是雄

任子十卷 名身

學所以治已教所以治人○喜能歌舞怒能
戰鬪○一人之智不如衆人之愚一目之察
不如衆目之明○生於治長於治知世之所
以治者君子也生於亂長於亂知世之所以
亂者君子也若不知治亂之所因者凡民也
○道德之懷民猶春陽之柔物履深水而不
寒結木條而不折○天之圓也不中規地之
方也不中矩○山必有阜河必有曲江漢東
流必有迴復○直木無陰直士無徒是以賢
人直士常不容於世○登泰山見天下之大
不察細者視遠故也處高位知人主之貴不
卹卑賤者意滿故也○治已審則可以治人
治人審則可以治天下累世一聖是繼踵千
里一賢是比肩○水可乾而不可奪濕火可
滅而不可奪熱金可柔而不可奪重石可破

而不可奪堅○諺云富不學奢而奢貧不學

儉而儉人情皆能唯聖人能節之木氣人勇

金氣人剛火氣人強而燥土氣人智而寬水

氣人急而賊○神龍不處網罟之水鳳凰不

翔蔚羅之鄉賢人不入危國智者不輔亂君

○蕭何守文法曹參務無苛相繼作相天下

獲安武帝輕人命重武功飾宮室厚賦斂土

地盜廣德惠彌狹○桓譚云王者易輔伯者

難佐

篤論四卷 杜恕

水性勝火分之以釜既則火強而水弱人性

勝志分之以利欲則志強而性弱○考實性

行莫過於鄉閭校才選能莫善於對策杜氏

始出帝堯在周爲唐杜氏漢世有杜周杜欽

杜篤○畿字伯侯魏書有傳畿長子理字務

仲少而機察故名曰理少子恕字務伯○陸

下謂以今世無良才朝廷之賢佐豈可追望

前世之樞契坐待後來之俊又可能治乎恕

在河東坐卧恒避父住處恕子預字元凱晉

書有傳

體論四卷 杜恕

不動如山難知如陰人有厚德無問小節人有
大舉無管小故隋侯之珠不能無類○夫
人臣猶如土也萬物載焉而不辭其重水瀆
汚焉而不辭其下草木植焉而不有其功夫
行者榮辱之皂白○君子居必選鄉遊必擇
士至人之治也處國於不傾之地積政於萬
全之鄉載德於不止之輿行令於無竭之倉
使民於不爭之塗開法於必得之方庶民水
也君子舟也水所以載舟亦所以覆舟○怨
性疎情但飽食而已家有書傳頗嘗涉歷父
憂行喪在禮多愆孝聲不聞後除中郎又作
黃門郎同朝友人問余志余答曰見大臣論
議或黨甲苦乙所親或黨乙謗甲所親余處
甲乙之間幸無毀譽耳

傳子一百二十卷

水大者發越小者敷揚土是人之母也故人
有戀土之心買隣人價貴宅宅可買隣不可
得也○冠冕之冠行袿之行亦袿也服袿之
服行亮之行亦亮也處市井之肆服君子之

服在小人之中行賢哲之事猶夜行珮珠玉
也亦灼然矣蜘蛛作羅罽之作窠其巧亦妙
矣說復人乎黃金累千不如一賢人而無廉
猶衣服之無殺食味之酸鹹○郭林宗謂仇
智季白子嘗有過否智季白暮飯牛牛不食
搏牛一下語曰士非璧也談者謂價耳談者
之口猶愛憎之心○智慧多則引血氣如燈
火之於脂膏炷大而明明則膏消炷小而暗
暗則膏息息則能長久也○雄聲而雌視者
虛偽人也氣急而聲重者敦實人也○蒙恬
築長城人不堪苦白骨山積乃有歌曰生男
慎勿舉生女鋪用鋪不見長城下白骨相積
柱作黃金者是方士取草屑合金燒之故草
屑燃金落下

太元經十四卷 孫卿撰

怒如烈冬喜如溫春○鸞鶴鳳子養性高時
隱耀深林不食滓穢○內清外濁弊衣裘玉
○十里九坎牛馬低昂○天氣左轉星辰右
行陰陽運度報返相迎○強梁者亡拙強者
折大健者跋大利者缺激氣成風湧氣成雨

濁霧成雪清露成霜

化清經十卷

濁者不信淵生之清而甘濯之濁矣○動則
虎發靜如鱗潛若彼赫赫若此洋洋○將飛
者翼伏將奮者足踞將噬者爪縮將言者口
默將文者且朴

鄒子一卷

欲知其人視其朋友蒞藝在田良苗無所措
其根佞邪在朝忠直無所容其身○寡門不
入宿臨甌不取塵避嫌也

成敗志三卷 孫卿撰

水性雖能流不導則不通人性雖能智不教
則不達學猶植也不學將落○容者天地之
際會成敗之機要故陰陽不密者寒暑不能
以成歲棟宇不密則九層不可以庇身

古今通論三卷 王晏

崑崙東南方五千里謂之神州州中有和羹
鄉方三千里五嶽之域帝王之宅聖人所生
也○倉頡造書形立謂之文聲具謂之字字
者取其華乳相生在於竹帛謂之書

中論六卷 徐偉長作
任氏註

倚立而思遠不如速行而必至矯首而徇危
不如修翼之必獲孤居而願智不如積學之
必達君子不邨年之將暮而憂志之有倦道
之於人甚簡遂沒不言屍殊異焉遠也○人
之涉世譬如奔基苟不盡道誰無死地但不
幸耳

唐子十卷 名滂字惠潤生
吳太元二年

舟循川則游速人順路則不迷○大木百尋
根積深也滄海萬仞衆流成也淵智達洞累
學之功也君子以道成冠以道成與出門不
冠則不敢行行非與則不可步有父不能孝
有兄不能敬而論人父子之義昆弟之節猶
彎弓而自射也○人性苟有一孝則無所不
包猶樹根一植百枝生焉○或問齊桓晉文
優劣唐子答曰論功則桓凡而文弟論德則
文凡而桓弟○大晉應期一舉席卷猶震靈
摧枯千鈞壓卵無餘類矣○人多患遠見百
步而不自知眉頰知眉頰者復不能察百步
也君子守真仗信遭時不容雖有訕辱之恥

幽垢之謗猶傷體毛耳鷹隼羣飛鳳凰遠遊
小人成列君子深藏謗白脂粉雖多醜面可
加膏澤雖光不可潤草古人自短於自見故
以鏡觀形心短於自治故以禮自防君子不
以昏行易操不以夜昧易容○夫自有高世
之名必有負俗之累有絕羣之節必嬰謗嗤
之患白骨擬象魚目似珠遠聽遠望無不亂
也○禍福相轉利害相生如循環而運九耳
其兆不可見其端不可覺○良將如山如淵
人不知其感亦不知其歡○將勿難鼓旗師
之耳目○暴至之榮智者不居守財不拖謂
之錢奴○佐闔者傷預事者亡

秦子二卷

欲顯白於雪中馳光於日下不可得也○顏
彥先難云有味如醪而不醉人其味如黍飲
之則醉何也秦子曰醉在小人不在君子吾
欲錦中而紵表不欲繡外而麻裏猶論者寧
匱於辭不匱於理○遠難知者天近難知者
人○因斧以得柯因柯以成用種一粟則千
萬之粟滋種一仁則衆行之美備矣○鍼雖

小入水則沈毛雖大入水則浮性自能也

梅子一卷

伊尹呂望傳說箕子夷齊柳惠顏淵莊周阮
籍易地而居能行所不能行也阮籍孝盡其
親忠不忘君明不遺身智不預事愚不亂治
自莊周已來命世大賢其惟阮先生乎按其
書晉人也

物理論十六卷

欲定天下而任小人者猶欲捕羣鹿而張兔
罝不可得也○忿颯焚衣其損多矣忿憂之
熟推既而棄之損益多○語曰上不正下參
差古者所以不欺其民也劉剝富強以養貧
弱何異餓耕牛乘馬而飽吠犬棄干將而礪
鉛刃也○論語聖人之至教王者之大化鄉
黨篇則有朝廷之儀聘享之禮堯曰篇則有
禪代之事夫文彩之在人猶榮華之在草○
給事中與高堂隆秦朗爭指南車二子云古
無此車記虛言耳先生曰爭虛空言不及如
試之效也言於明帝明帝詔使作之車乃成
○翻車先生居在京師城內有地作園而志

無水可溉乃作翻車令童兒轉之其功百倍
 天地成歲也先春而後秋人君之治也先禮
 而後刑教嬰孩之疾而不忍鍼艾更加他物
 以至死也今除肉刑者更眾何異服他藥也
 肉刑雖斬其足猶能生育也張倉除肉刑每
 歲所殺萬計鍾繇復肉刑歲生二十人也
 肉刑名者猶為獸登俎而作肉○今有弱子
 當陷大辟問其慈父必乞以肉刑代之苟可
 以生易死也有道之君能不以此加百姓乎
 蛇螫在手壯夫斷其腕謂其雖斷不死也○
 曹義曰繫馴駒以繆絆御悍馬以腐索令制
 民以輕刑亦如死也○但知管子借耳於天
 下不知堯借人心而後用其耳目○昔燕趙
 之間有三男共娶一女生四子後爭訟廷尉
 廷壽奏云禽獸生子逐母宜以還母尸三男
 子於市○塞一蟻孔而河決息施一車轄而
 覆乘止立法令者亦宜舉要○禮云繼父服
 齊衰○傳子曰母捨己父更嫁他人與兄父
 甚於兩絕天也○又制服恐非周孔所制亡
 秦焚書以後俗儒造之○妄進者若卵投石

逃誅者若走赴深○擘若春華之並發馥若
 秋蘭之俱茂○樹上懸瓠非木實也背上被
 裘非春毛也此似而非九日養親一日餓之
 豈得言飽多飢少固非孝乎殺馬十日一日
 餓之馬肥不損於義無傷不可同之一日餓
 母也○漢末有管秋陽者與弟及伴一人避
 亂俱行天雨雪糧絕謂其弟曰今不食伴則
 三人俱死乃與弟共殺之得糧達舍後遇赦
 無罪此人可謂善士乎孔文舉曰管秋陽愛
 先人遺體食伴無嫌也荀侍中難曰秋陽貪
 生殺生豈不罪邪文舉曰此伴非會友也若
 管仲啖鮑叔貢禹食王陽此則不可向所殺
 者猶為獸而能言耳今有犬齧一狸狸齧一
 鸚鵡何足怪也昔重耳戀齊女而欲食狐偃
 叔敖怒楚師而欲食五參賢招之忿猶欲啖
 人而况遺窮者乎○見虎一毛不知其斑道
 家笑儒者之拘儒者嗤道家之放皆不見本
 也止響以聲逐影以形姦爭流蕩不知所止
 也○傳子曰云孟軻荀卿若在孔門非唯游
 夏而已乃舟閔之徒也○積薪若山縱火其

下火未及燃一杯之水尚可滅也及至火猛
 風起雖傾河海不能救也秦昭王是積薪而
 縱火其下始皇燃而方熾二世起風而怒也
 ○秦人視山東之民猶猛虎之睨羣羊何隔
 憚哉○范蠡字少伯楚三戶人也使起滅吳
 已後乘輕舟遊五湖王令人寫其狀恒朝禮
 之列仙云徐人也○傳氏之先出自陶唐傳
 說之後○玄字休奕子哉字長虞晉書有傳
 ○楚漢之際有好事者作世本上錄黃帝下
 達漢末班固漢書因父得成大孝養志其次
 養形養志者盡其和養形者不失其敬割地
 利已天下讎之推心及物天下歸之以信接
 人天下信之不以信接人妻子疑之見疑妻
 子難以事君君子修身居位非利名也在乎
 仁義○人皆知脩其器莫知洗其心君子審
 其宗而後學明其道而後行或云玄衡以善
 詩至宰相張禹以善論作帝師豈非儒學之
 榮乎○傳子曰學以道達榮不以位顯吾觀
 班固漢書論國體則飾主闕而抑忠臣叙世
 教則貴取容而賤直節述時務則謹辭章而

10947A

略事實非良史也。墨子兼愛是廢親也。知喪是忘憂也。漢太宗除肉刑匹夫之仁也。非天下之仁也不忍殘人之體而忍殺人故曰匹夫。○伊尹耕於有莘孰知非夏之野人。呂尚釣於渭濱孰知非殷之漁者。遇湯武文王然後知其非也。面岐路者有行迷之慮。仰高山者有飛天之志。或乘馬乘車而俱至秦者所謂形異而實同也。○若謂黃帝後方有舟楫庖羲之時長江大河何所用之。經巨海者終年不見其涯。測虞淵者終世不知其底。故近者不可以度遠也。○漢世賦輕車而令貴之。○青與赤謂之文赤與白謂之章白與黑謂之黼黑與青謂之黻五絲謂之繡。○始皇冢令匠人作機弩有人穿者即射之以人魚膏作燭。○逐兔之犬終朝尋兔不失其迹。雖見麋鹿不暇顧也。○漢高祖度關而網踈故後世推誠而簡直。先武教一而網密。故後世守常而禮義。魏武亂亂以尚猛。天下修法而貴理。○形自正不求影之直而影自直。聲之平不求響之和而響自和。德之崇不求名之

遠而名自遠。○西國胡言蘇合香是獸便中國獸便而臭忽聞西極獸便而香則不信矣。○必得崑山之玉而後實則荆璞無夜光之美。必須南國之珠而後珍則隋侯無明月之稱。始皇遠遊並海而不免平臺之變及罪驪山。尋見發掘今有鉛錫之鋌雖歐冶有鍊猶不如瓦刀有鴛駝之馬雖造父駕之終不及飛兔絕景質鈍故也。土不可作鐵而可以作瓦。○相者曰三亭九候定於一尺之面。愚智勇怯形於一寸之目。天倉金匱以別貧富貴賤。○光武鳳翔於南陽。燕雀化作鷦鷯。二漢之臣煥爛如三辰之附。長天長平之卒磊落如秋草之中繁。霜勢使然也。○長人數丈身橫九畝兩頭異頸四臂共骨。老人生角男女變化何益於賢愚耶。○豈有太一之君坐於庶人之座。魁罡之神存於匹婦之室。○傳子曰諸葛亮誠一時之異人也。治國有分御軍有法積功興業事得其機入無遺刃出有餘糧。知蜀本弱而危故持重以鎮之。姜維欲速立其功勇而無決也。○馬先生綾機先生

名鈞字衡天下之名巧也。綾機本五十綜五十簾六十綜六十簾先生乃易二簾奇文異變因感而作自能成陰陽無窮也。指南車見周官亦見鬼谷子先生作辯上下者莫正乎位與國家者莫貴乎人。統內外者莫齊乎分。宣德教者莫明乎學。兼綱而目自張執本而末自從善賞者賞一善而天下之善皆勸善罰者罰一惡而天下之惡皆除矣。世質則官少時文則吏多有虞氏官五十夏后官一百殷有二百周有三百國典之墜猶位喪也。位之不建名理廢也。○以譽取人則權勢移於下而朋黨之交用以功進士則有德者未必授而凡下之人或見任也。君子內洗其心以虛受人外設法度立不易方。今人稱古多賢惡世無人退不三思坐語一世豈不惑邪。○人之性如水焉置之圓則圓置之方則方澄之淳而清動之則流而濁先王知中流之易擾亂故隨而教之謂其偏好者故立一定之法龍舟整機王良不能執也驥駉齊行越人不敢御也各有所能構大廈者先擇匠而後

棟材治國家者先擇位而後定民○人之學如渴而飲河海大飲則大盈小飲則小盈大觀則大見小觀則小見○金以利用錢以輕流此二物飢不可食○入粟補吏是責官也罪人以贖是縱惡也○世富錢流則禁盜鑄

錢世貧滯則禁盜壞錢○天子之害莫害於女飾盈一頭之飾盈千金之價婢妾之服亦重四海之珍○公卿大夫刻石作碑錫石作虎碑虎崇儒陳於三衢妨功喪德異端並起撞亡秦之鍾作鄭衛之樂欲以興治豈不難哉○賞不避疎賤罰不避親貴貴有常名而賤不得冒尊有定位而卑不敢逾經之以道德緯之以仁義織之以禮法既成而後用之謂有孝廉秀才之貢或千里望風承聲而舉故任實者漸消積虛者日長○聞一善言見一善事行之唯恐不及聞一惡言見一惡事速之唯恐不速○懸千金於市市人不敢取者分定也委一錢於路童兒爭之者分未定也○三皇貴道而尚德五帝先仁而後義三王先義而後亂○鴻毛一羽在水而沒者無

勢也黃金萬鈞在舟而浮者託舟之勢也○擬金人銘作口銘曰神以感通心由口宣福生有兆禍來有端情莫多安口莫多言矚孔濱河淄川傾山病從口入患自口出存亡之機閉闔之術口與心謀安危之源樞機之發榮辱隨焉夫有公心必有公道○愛己者不能不愛憎己者不能不憎民富則安鄉重家敬上而從教貧則危鄉輕家相聚而犯上飢寒切身而不行非者寡矣我欲戰而彼不欲戰者我鼓而進之若山崩河溢當其衝者推

直其鋒者破所謂疾雷不暇掩耳則又誰禦之兵起吮瘡者之膿積思以感下也史記云吳起吮腫晝戰目相見夜戰耳相聞得利同勢失利相殺陸田者命懸於天人力雖修水旱不時則一年之功棄矣水田制之由人人力苟修則地利可盡○傳子曰聖人之道如天地諸子之異如四時四時相反天地合而通焉且易不向抹金攻玉涉艱難也路不險則無以知馬之良任不重則無以知人之材君子相見非但與善將以攻惡惡不廢則善

不興療暑莫如親水救寒莫如重裘止謗莫如修身善釣者不易淵而釣君子不隣席而追道○小人恥其面不如子都君子恥其行不如舜禹故小人貴明鑒君子尚至言○射以平志御以和心書以綴事數以理煩○利如激風之至暴雨之集不論是非不議直曲期於不窮激放必勝辨者別也言其善分別事類非謂言辭捷給而凌善人也○聖人蹈機極杆織成天地使萬物順焉人倫正焉登高而建旗則所示者廣順風而奮鐸則所聞

者遠非旌色益明鐸聲遠長所託得地而泥富貴施政令乎○良農不患墾場之不修而患風雨之不節君子不患道德之不建而患其時之不至○聖人之世不交遊也周道衰而交遊興古之交也近今之交也遠古之交也求賢今之交也為名取不由鄉黨考行不本閭閻多助者則稱賢才少愛者則謂不肖○馬必待乘而後致遠醫必待使而後愈疾賢者待用而後興理
意林卷之五

(042) A 227